

Tres Pregunta

Pèrmitími hasíbo tres pregunta. Kon bo ta kontestá ta sumamente importante, pasobra bo kontesta ta afektá bo bida awor i bo destino eterno!

1) Di unda mi a bin? Klaramente nos tur ta nase di nos mayornan. Ma e pregunta aki ta mas básiko. Kon biní bo ta riba mundu?

Tin hende ta bisa ku bo a bin di makaku ku generashonnan anterior a bin for di un supstansia original deskonosí. Henter e proseso ta aksidental. **Ta pa kasualidat ku bo ta eksistí.**

En kontraste, Palabra di Dios ta kontestá e pregunta bisando **ku Dios a kreábo i ponébo riba mundu!** “*Dios a krea hende segun Su mes imagen ...*” (Génesis 1:27). E ta stimábo i ta sumamente interesá den bo. Bo ta presioso p’E.

2) Pakiko mi ta eksistí? Hopi hende tin impreshon ku Dios no ke pa hende gosa bida. Nan ke sa ku Dios ta un pachi bieu krepchi ku barba largu blanku sintá na shelu ku un klòp den Su man mirando hende riba mundu, hasiendo pregunta, “Boso ta gosando ei bou? Stòp e kos ei!”

Alkontrario! Esun ku a kreábo ke bo bon! Pasobra E ta stima nos, El a duna nos Beibel pa nos sa kon nos mester biba. Si bo biba conforme instrukshon di bo Kreador den Skritura Santu, bo bida lo ta muchu mas felis i bo lo hasi E kontentu! Hesus a bisa: “*Ami a bin pa nan tin bida i pa nan tin e na abundansia*” (Juan 10:10).

Ma ta keda na bo si bo lo sigui instrukshon di bo Kreador! Bo ta liber pa ignorá loke Dios ta bisa. Ma bo lo no ta liber di e konsekuensianan di desobediensia. Komo resultado di desobedesé Palabra di Dios, hende ta bira katibu di droga i alkohòl, keda infektá ku un enfermedat venérikò, ta sali na estado na edat hóben, tin tur klase di problema inter-personal.

Pakiko bo ta aki? Bo ta eksistí pa hasi bo Kreador—no bo mes—kontentu! I hasiendo E kontentu, bo mes lo desfrutá!

3) Unda mi ta bai? Si ta bèrdat ku hende a bin for di makaku—ku ta pa kasualidat ku bo ta eksistí—bo bida ta sin proposito. Bo’n ta mihó ku bestia. Di bèrdat bo por biba manera bestia pasobra mañan bo tòg ta muri manera bestia. Mihó bo gosa awe, pasobra mañan tur kos ta kaba.

Un hende ku ta kere ku nan ta eksistí pa kasualidat ma tòg ta biba un bida moral i étiko ta un hende ku su bida no ta kuadra ku su kreensia. Si bida ta kaba na nada na morto, hende por hòrta trankil, mata otro, komportá nan manera bestia den e parti seksual pasobra nan tin ku duna kuenta na ningun Dios.

Ma Beibel ta laga sa ku **morto NO ta final**. Despues di morto, bo tin ku para dilanti Esun ku a kreábo i duna kuenta pa e bida ku El a dunábo. Beibel ta bisa, “*Hende ta destiná pa muri un biaha so i despues di esaki ta bin huisio*” (Hebreonan 9:27). Salomon, e hòmber mas sabí, a studia hopi filosofia di bida i a resumí su estudio asina: “*E konklushon di tur loke ku a wòrdu tendí ta: teme Dios i warda Su mandamentunan, pasobra esaki ta aplikabel na kada persona. Pasobra Dios lo trese tur echo na huisio, tur kos ku ta skondí, sea bon òf malu*” (Eklesiastes 12:13-14).

Resultado di Dios Su huzgamentu lo determiná bo destino etèrno, sea lo ta ku Dios òf alehá for di bo Kreador, na fièrnu. **Aworaki ta tempu pa prepará pa e dia ei.** No tin chèns mas pa prepará despues di morto.

Tres pregunta sumamente importante: 1) Di unda mi a bin? 2) Pakiko mi ta eksistí? 3) Unda mi ta bai? Tin tambe tres kontesta importante: 1) Dios a kreábo. 2) Bo ta eksistí pa hasi bo Kreador kontentu. 3) Bo tin ku duna kuenta na bo Kreador.

Kontestá e tres pregunta aki pa bo mes. Ma pensa bon, pasobra bo kontesta lo afektá bo bida awor i bo destino etèrno!